



mjesečni Bilten

omladinska mreža bosne i hercegovine



Novembar
studeni
2020

258

Dragi prijatelji/ce,

Predstavljamo vam **novembarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u novembru.....	2
Planovi za decembar.....	8
Aktivnosti članova mreže.....	9
Saopštenja/informacije/donatori/pozivi	22

Uživajte u čitanju!

AKTIVNOSTI ORC/HCA U NOVEMBRU 2020.

#Brzi odgovor 2020 - #Sjašite

Vojna vježba „Brzi odgovor“ provodi se u BiH od 2010. godine. U okviru kampanje #sjašite, od mladih smo tražili drugačiji Brzi odgovor – s ciljem održavanja mira i stabilnosti, treba brzo odgovoriti:

- Koliko iksića smijete staviti na izbornom listiću za lokalne izbore da bi vaš listić bio važeći?
- Ko od onih koji traže vaš glas ima program za mlade i gdje ga možemo vidjeti?
- Ko grije stolicu u Parlamentarnoj skupštini BiH od 96. a ko će nakon izlaska iz politike imati reference da karijeru nastavi pod šatorom s mikrofonom?
- Ko i kako bira gradonačelnika Sarajeva, koga i kako birate vi?



Kviz u Sarajevu održan je drugačije od većine predizbornih skupova – bilo nas je dvadeset, nosili smo maske, nismo poticali nikoga na mržnju, nismo obećavali članstvo u NATO-u a i podsjetili smo mlade da općinski vijećnici ni načelnici svakako nemaju nikakve veze s tim. Usput, podsjećamo:

Da saznate čime se vijećnici, načelnici i gradonačelnici mogu zaista baviti, a o čemu maštaju dok ljuto mašu rukama na predizbornim skupovima – pročitajte entitetske Zakone o lokalnoj samoupravi. Glasati na izborima znači izabrati osobu koja će biti vaš kanal komunikacije, djelovanja i rada u lokalnoj upravi – ali i držati tu osobu odgovornom za glas koji je dobila tokom četiri godine mandata.

Slobodan Blagovčanin, aktivista kampanje Sjašite, poručio je kako je važno posebno za mlade ljude da osvijeste kapacitete njihove snage u izbornom procesu.

„Iako izlaznost mladih ljudi na izbore u Bosni i Hercegovini nije dramatično niska, već je prosječna – nama u našoj zemlji uvijek treba više od prosjeka. Važno je da se mladi ljudi podsjetite kako ispravno glasati, da pogledaju ko nudi kakve programe, da se podsjetite na to šta su do sada živjeli i šta žele živjeti, ako uopće žele živjeti u ovoj zemlji. Za sedam dana glasamo, biramo, odlučujemo i poručujemo – Sjašite!“

(Nešto drugačiji) Brzi odgovor provodi se u okviru kampanje #Sjašite, u organizaciji Šatro.info, CAT BiH i MAP.

CAT – Bosna i Hercegovina

Tokom mjeseca novembra, nastavili smo sa našim redovnim aktivnostima u sklopu projekta „CAT – Bosna i Hercegovina“.



Naše mačke su nastavile da oduševljavaju javnost na društvenim mrežama, a ovog mjeseca u PodCat-u sa Malikom ugstili smo buduće mlade vijećnike grada Tuzla.

Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).

CAT Patrola: Mirza Mustafagić

Provozali smo Mirzu Mustafagića!



Mirza Mustafagić je mladi pravnik, influencer, CEO i osnivač PR2M Agency koji trenutno završava i Master studije i to iz oblasti Državnog i međunarodnog javnog prava na temu društvenih mreža. [VIDEO](#)

Ovo nije još jedan #FakeTaxi, ovo je #CatPatrola!

PodCat: Mladi vijećnici GV Tuzla

Gosti šeste epizode PodCAT-a sa Malikom bili su novi mladi vijećnici u GV Tuzla.

Selma Čatibušić, Admir Čavalić i Omer Berbić su sa Malikom razgovarali o sadržaju koji nedostaje mladima u Tuzli, kako je biti prvi unutar svoje liste, šta će konkretno za mlade uraditi tokom svog mandata te o stvaranju neformalnog kluba mladih unutar Gradskog vijeća Tuzla.



Posebno se zahvaljujemo Američkom kutku u Tuzli koji nam je za snimanje ove epizode omogućio svoj prostor.

[VIDEO](#)

#PodCat #višeodaktivizma

Ulična akcija Prijedor – Mačke u zajednici

Mladi u Prijedoru odlučili su se za varijantu da svoje transparente urade na Rudarskom fakultetu sa kojeg su poslali jasnu poruku javnosti, a to je da studenti hoće dom u Prijedoru.



Mladi su skrenuli pažnju javnosti na njihov višegodišnji problem i aktivnost je daleko odjeknula.

Trening WB4CHANGE - Sarajevo

Onlajn diskusija na temu "Kako do svog prostora?" u sklopu kampanje #mladimaprostora.

Udruženje Zdravo da ste i kampanja Tvoj glas je bitan zajedno realizuju kampanju #mladimaprostora.

Kampanjom želimo skrenuti pažnju na problem što u BiH nema dovoljno prostora koji su namijenjeni i prilagođeni omladini te inspirisati mlade da traže svoje prostore, ali im i ponuditi smjernice kako da to učine, te predstaviti modele dobre prakse. [VIDEO](#)



Kampanja #mladimaprostora je pokrenuta u sklopu CAT digitalne akademije.



Anna Lindh Fondacija
Bosanskohercegovačka mreža

11. Sastanak ALF BiH Mreže u BiH

U Vitezu je, u periodu od 5. Do 7. Novembra 2020. Održan godišnji sastanak članica ALF Mreže i Izborna skupština za nove članove upravnog odbora. Sastanku je prisustvovalo ukupno 20 članica ALF BiH. Zbog situacije sa pandemijom COVID, 8 učesnika je prisustvovalo lično na sastanku, dok je njih 12 prisustvovalo preko aplikacije ZOOM. Teme ovogodišnjeg sastanka bile su:

1. Izvještaj o radu kancelarije u prethodnom periodu i planirane aktivnosti
2. Izvještaj učesnicima o tome ko je iz ALF BiH dobio sredstva za projekte, po pozivu ALF-a
3. Diskusija
4. Pripreme za glasanje za nove članove odbora
5. Izbor Novih članova odbora
6. razno

1. Miralem Tursinović je informisao članove o radu kancelarije u prethodnom periodu. Većina aktivnosti je zbog COVID pandemije održavana on-line, dok su učešće na Sarajevskoj zimi, te Mediteranski ALF Forum u Šibeniku otkazani. Zaključak učesnika je bio da se taj izvještaj dostavi i u pisanoj formi.
2. Miralem Tursinović informisao je učesnike su ove godine za poziv na projekte aplicirale 4 članice, a da je samo jedna, i to članica koja je zbog neaktivnosti brisana iz mreže još prošle godine – Humanost u akciji - dobila sredstva za projekat, na šta nije imala pravo. Zaključak učesnika bio je da se pošalje pismo Generalnom sekretarijatu u ovome problemu, te da se isto tako kontaktira i organizacija Humanost u Akciji (HIA) Sarajevo.



3. Tokom diskusije istaknuto je da je i dalje veoma slaba komunikacija među članicama, kako lično, tako i putem mejling liste. Ibrahim Soahić je istakao da je na listu slao Platformu za saradnju sa međunarodnom zajednicom, ali da nije bilo odaziva. Isto tako, članice su tražile i izvještaj UO ALF za protekli period, pošto ga nije bilo.
4. Koordinator Miralem Tursinović je pojasnio da je 18 organizacija do sada dalo prijedloge za članove upravnog odbora. Dosadašnji članovi odbora kojima je istekao mandat:
 1. Jasmin JAšarević – PRONI Brčko
 3. Boris Balta – Magic Factory Tuzla
 4. Maja Vejzović – Voloder – LDA Mostar
 5. Novica Bogdanović – DIS Teatar Banja Luka
 6. Vehid Šehić – Forum Građana Tuzle
 7. Haris Halilhodžić – Pod istim suncem Jablanica

Ivanu Sajeviću Mandat traje do 11.2021.

Čedomir Glavaš – Odisej Bratunac poslao je pismo da zbog bolesti ne može više obnašati funkciju, te da njegova organizacija više ne radi.

Ukupno 18 članica je poslalo kandidature za članove odbora: 14 njih se saglasilo da se reizaberu stari članovi.

Dvije članice – Naša djeca Zenica i SEEYN Sarajevo, zbog nemogućnosti prisustvovanju sastanku i on-line, dale su ovlaštenje glavnoj kancelariji da u njihovo ime glasa za kandidate.

Novi prijedlozi su:

Ibrahim Spahić – IPC Sarajevo

Anes Husanović – Tuzla live Tuzla

Velma Šarić – CPI Sarajevo

5. Prilikom glasanja došlo je do razmimoilaženja stavova. Iako je na počesku skupštine, prema Sporazumu o saradnji, bilo prisutno 50% + jedan član, nakon raznih prijedloga (da se svi kandidati, njih 10 izaberu, Ibrahim spahić je povukao svoju kandidaturu i nominovao Enisu Raković iz glasa žene Bihać, te istakao da nije u redu da su iz Tuzle dva člana UO, na šta je Vehid Šehić iz FGT reagovao i povukao svoju kandidaturu). Na sve ovo tri člana ALF su napustili sastanak, tako da smo ostali bez kvoruma. Ipak, ostatak članova je za nove / stare članove izabrao:

Jasmin Jašarević – PRONI Brčko
Boris Balta – Magic Factory Tuzla
Maja Vejzović – Voloder – LDA Mostar
Novica Bogdanović – DIS Teatar Banja Luka
Haris Halilhodžić – Pod istim suncem JAblanica
Ivan Sajević – ENTER Vitez
Anes Husanović – Tuzla live Tuzla
Velma Šarić – CPI Sarajevo
Enisa Raković – Glas žene Bihać

6. Jasmin Jašarević je predložio da se, na osnovu tačke 11. Iz Etičkog kodeksa, dijela sporazuma ALF Članica, pošto on lično ima problema sa određenom organizacijom iz mreže, osnuje Etički sud ALF Mreže BiH. Nakon nekoliko prijedloga, usvojeni su sljedeći članovi:

Lahira Sejfija IPAK Tuzla
Denija Hodžić – CURE Sarajevo
Lamija Spahić proMENTE Sarajevo
Vehid Šehić – FGT Tuzla
Sastanak je završio u 16.15.

Profesionalna orijentacija kroz pasoš kompetencija



Norwegian Embassy
Sarajevo



Kroz ovaj projekat, koji je podržan od Vlade Kraljevine Norveške, u okviru projekta „Stvaranje povoljnijeg okruženja za civilno društvo – EMBRACE“, nastavili smo sa srednjoškolcima iz TK. U okviru toga ćemo tokom oktobra nastaviti sa setom– treninga „Životne vještine i vještine zapošljavanja“ za 100 učenika u Tuzlanskom kantonu



REDOVNE AKTIVNOSTI ORC I HCA TUZLA

Tokom novembra radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA DECEMBAR 2020.

- snimanje TV emisija na RTV 7,
- Emitovanje i promocija dokumentarnog filma o Muftiji Kurtu,
- Nastavak redovnih aktivnosti u okviru ALF BiH, CAT BiH...

Nastavak aktivnosti sa srednjoškolicima iz TK, u okviru projekta „Profesionalna orijentacija kroz pasoš kompetencija“, koji je podržan od Vlade Kraljevine Norveške, u okviru projekta „Stvaranje povoljnijeg okruženja za civilno društvo – EMBRACE“. U okviru toga ćemo tokom decembra Implementovati sa vjetovanje za pasoš kompetencija, te izvršiti superviziju pri pasošima kompetencija organizacije S.K.I.L.L.S

AKTIVNOSTI ČLANICA OMLADINSKE MREŽE BiH



Asocijacija srednjoškolaca u Bosni i Hercegovini"
Ul. Mula Mustafe Bašeskije 7, 71000 Sarajevo
Tel/fax: +387 33 205 850
E-mail: asubih@yahoo.com
Web: www.asubih.ba

Realizovan kamp „I kopija vrijedi“ na Boračkom jezeru

Na suncem obasjanom Boračkom jezeru, u periodu od 3. do 6. augusta, Asocijacija srednjoškolaca u Bosni i Hercegovini uz podršku Instituta za razvoj mladih KULT i Ambasade Kraljevine Švedske u Bosni i Hercegovini, realizovala je kamp “I kopija vrijedi” 2020. i time obilježila još jednu najljepšu priču ovog ljeta!

Ovaj edukativni kamp okupio je ukupno 45 učesnika/učesnica – srednjoškolaca, koji su sa trenerima imali priliku raditi, učiti i iznositi stavove o različitim tematikama. Naravno, fokus našeg kampa bio je priprema omladinskih facilitatora za sprovođenje istraživanja u 28 različitim lokalnih zajednica. Za ova četiri dana trajanja kampa, učesnici su imali priliku učiti o zagovaračkim inicijativama, historijatu inicijative “I kopija vrijedi”, istraživanjima i sprovođenju istih, fokus grupama, vođenju intervjuva i tome sličnim temama.



No, najljepša priča ovog ljeta ne završava samo tako, već se proteže i na jesen i na zimu! Naše aktivnosti se nastavljaju, pa tako i naši učesnici, osposobljeni facilitatori iz 28 lokalnih zajednica, sprovodit će istraživanje o provedbi i uspješnosti inicijative “I kopija vrijedi” u svojim lokalnim zajednicama. Nakon

ispitivanja stavova srednjoškolaca o pomenutoj temi, uslijedit će kreiranje dokumenta koji će biti dostupan javnosti pod nazivom “Informacije o provedbi i uspješnosti inicijative “I kopija vrijedi”. Ono što nas najviše raduje jeste da, poslije formiranog dokumenta, krećemo u zagovaranje provedbe inicijative na Univerzitetima u Republici Srpskoj, i to u Istočnom Sarajevu i Banjoj Luci.

Ne daj da ti obrazovanje blijedi, dopusti da I KOPIJA VRIJEDI!

Ne klikam u prazno

Medijski sadržaji su značajan dio života mladih i imaju jak utjecaj na oblikovanje njihovih stavova i odluka. No, srednjoškolci/ke rijetko imaju priliku da se edukuju iz oblasti medijske i informacijske pismenosti, koja je danas jednako važna kao i klasična pismenost. Projekat Ne klikam u prazno namijenjen je upravo njima i nastoji povećati stepen medijske pismenosti srednjoškolaca/ki u BiH.

U okviru projekta, družili smo se sa srednjoškolcima/kama u nekoliko gradova Bosne i Hercegovine, u kojima su održali 15 radionica o medijskoj pismenosti. Radionice su se održale u saradnji sa lokalnim timovima ASuBiH-a i srednjoškolcima/kama širom BiH. Na radionicama smo razgovarali o medijima, društvenim mrežama, lažnim vijestima, meme-ovima, spamovima, prevarama na internetu, ali i o tome kako postati online detektiv/ka



Radionice su vodili timovi koje čine vršnjački/a trener/ica i jedna osoba iz redakcije “Raskrinkavanja”, to jest UG “Zašto ne”.

Cilj treninga je bio stvaranje kompetentnih trenera/ica koji/e će znanje i iskustvo stečeno na treningu efikasno prenijeti na učesnike/ce radionica.

Kada vi šutite, mi #PitamoSe!

U utorak, 17.11.2020. godine, Asocijacija srednjoškolaca u Bosni i Hercegovini je obilježila Međunarodni dan srednjoškolaca!

Međunarodni dan srednjoškolaca se obilježava u znak sjećanja na studentske proteste koji su održani u Pragu 17.11.1939. godine, gdje su studenti protestovali protiv nacističke okupacije, te su streljani bez prethodnog suđenja. Ove godine navršava se 81 godina od njihovog stradanja.

Uz podršku srednjoškolaca širom Bosne, ove godine smo odlučili da nam glavni fokus bude na temi participacije mladih u procesima donošenja odluka. Iako je ovogodišnja situacija zbog pandemije COVID-19 malo otežala našu mogućnost održavanja aktivnosti, mi smo se potrudili da i ove godine javnost čuje uporan glas srednjoškolaca. Kampanju #PitamoSe koja se zasnivala na društvenim mrežama, smo koristili da interaktivno komuniciramo sa našom publikom, što nam je omogućilo da jasno vidimo probleme koji se ističu u lokalnim zajednicama.

Kampanja je započela na dan predizborne šutnje (14.11.), a pomoću nje, izdvojili smo 13 cjelina o kojima želimo biti pitani:

- prostoru za mlade
- strategiji za mlade
- budžetu za mlade
- službeniku za mlade
- sadržaju za mlade
- prilikama za mlade
- participaciji mladih
- adekvatnijim upisnim politikama
- adekvatnom prijevozu do škole
- podršci neformalnom obrazovanju
- funkcionalnoj online nastavi
- ukidanju segregacije u školama
- boljem statusu srednjoškolaca

Trudili smo se da što zanimljivije prikažemo ovaj jako ozbiljan problem na našim društvenim mrežama, te smo koristili aktivnost "Ko sam ja?" da prikažemo različite priče mladih ljudi koji su pogođeni ovim problemom, te smo također kreirali instagram filter kojim smo povezivali srednjoškolce širom Bosne i na taj način zajedno slavili. Ostale aktivnosti sastojale su se od promovisanja izrađenog plakata sa istaknutim zahtjevima, te lijepljenja istog na info ploče lokalnih zajednica i slanja dopisa medijima sa istaknutim zahtjevom koji odgovara problemima lokalne zajednice. Naša poruka mladima jeste da zahtjevaju da se pitaju o stvarima koje ih se tiču, te da preuzmu stvar u svoje ruke i budu glas promjene.

Sretan nam dan srednjoškolaca!





Udruženje građana "C.E.Z.A.R" Srbač

Zdravka Čelara 29, 78420 Srbač

Tel: 051 928 126

e-mail: zdravosrbac@yahoo.com

SVA LICA AKTIVIZMA

U okviru projekta „Sva lica aktivizma“ koji realizuje Genesis Project iz Banja Luke, oko 40 mladih ljudi iz Dragočaja, Čelinca, Srpcu, Kotor Varoši i Laktaša, uzrasta 15 do 30 godina, prijavilo se na javni poziv za uključenje u „onlajn“ projekat kako bi naučili osnove novinarstva i građanskog aktivizma te snimili svoj kratki film ili foto priču.



Udruženje građana „C.E.Z.A.R.“ je pomoglo snimanje jednog od filmova, koji je usmjeren vraćanju sjaja Bardači. Film su snimili članovi udruženja koji se već duži period uspješno bave fotografijom i videografijom kroz Panorama photography.

Humanitarni bazar za Minju Matić



U toku novembra je u Srpcu održan Humanitarni bazar u sklopu akcije „Minja da živi“ i to je prvi događaj ovog tipa u Srpcu. Udruženje građana „C.E.Z.A.R.“ je takođe učestvovalo u akciji, a na štandovima su se pored ostalih, našli predmeti koje su izrađivali učesnici naših kreativnih radionica, dok su naši volonteri ovaj put imali ulogu prodavaca.

Sav prihod koji je prikupljen, a u pitanju je 3015.75 KM je uplaćen na žiro račun za Minjino liječenje.



Završena ljetna pozornica u gradskom parku

Udruženje građana „C.E.Z.A.R.“ završilo je sa izgradnjom nadstrešnice na ljetnoj pozornici u gradskom parku u Srpcu, u okviru projekta „Mladi u akciji“, koji finansijski podržava Institut za razvoj mladih Kult iz Sarajeva.

Na ovaj način, Srbac je dobio prvu ljetnu pozornicu dimenzija 10x5 metara, koja će dolaskom lijepog vremena služiti za organizaciju mnogih kulturno-zabavnih manifestacija.





OMLADINSKA ORGANIZACIJA "SVITAC"
Ul. Jusufa Čampare bb, 76100 Brčko Distrikt BiH
Tel./Fax: +387 49 211 032
E-mail: svitac@gmail.net
Web: www.svitac.org
FB: www.facebook.com/omladinska.svitac

Dnevne radionice

Omladinska organizacija Svitac je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari na radionicama prilagođene uzrastu, uz pomoć lokalnih i međunarodnih volontera. Ovaj mjesec su radili: lutkarsku predstavu, kuće od drvenih štapića, Sunčev sistem i planete od papira. Gledali su video projekcije priča i bajki, te crtane filmove sa porukama o prijateljstvu: Pinokio, Spužva Bob, Tom i Jerry. Nastavili su sa azbukom i do sada su naučili pisati slova И, Ј, Л, Љ, Г i riječi koje počinju tim slovima (ovaj mjesec i na turskom jeziku), te su crtali pojmove koji počinju na određeno slovo. Na muzičkim radionicama su učili i vježbali pjesmice „Pačija škola“, tursku uspavanku te snimili video uz pjesmu „Dolina Mumijevih“. Sve pjesme su veoma zahtjevne i sastoje se od više stihova. Na radionicama engleskog jezika su radili vrijeme na satu (3, 6, 9 i 12pm/am), u bašti (in the garden), moja dnevna soba (my living room) i riječi koje su tematski vezane za Noć vještica. Naši najmlađi učesnici su takođe vježbali i pisanje brojeva. Kao i prethodnih mjeseci Svitac je u okviru redovnih aktivnosti intenzivno radio na temi higijena i posvetio joj posebnu pažnju. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Uzrast 13+ je učestvovao u online radionicama na teme: šta nam nudi srednjoškolsko obrazovanje, kako emocije utiču na trezveno donošenje odluka, zdrava ishrana i koje društvene mreže se koriste u ostvarivanju ciljeva (škola i slobodno vrijeme).

Na engleskim i njemačkim radionicama su posvetili pažnju gramatici i kompleksnijim rečenicama uz upotrebu prijedloga za kretanje, traženje objekata kroz četiri padeža, te su vježbali glagole u prošlom vremenu i konstrukciju rečenica. Pored toga su vježbali svakodnevnu komunikaciju i radili na projektima i prezentacijama za školu.

Koordinator radionica je bio Adin Midžić uz asistenciju lokalnih i EVS/ESC međunarodnih volontera.

Radionice gitare

Učesnici su radili na novim idejama. Prva je čisto ritmičan komad bez gitare i basa. Sastoji se od dvije mjere. Počinje sa tri takta u 7/8, koje slijedi jedan takt u 4/4 u brzom tempu. Radni naslov - „ABCD“.

Druga uključuje bas i električnu gitaru u sporijem tempu. Tempo je veoma spor, tako da učesnicima predstavlja izazov ostati u tempu. Radni naslov - „Instrument“.



Radionice sambe

Učesnici su nastavili sa radom na pjesmama, etidama i kompozicijama kao što su: "Dvije etide u a-molu" (F. Sor), "Hotel California" - (Eagles), "Đačko kolo", "Pjesma" J. Jovičić, „Kiša pada trava raste“, „Jesenska“ (V. Stojanov), „Kolisanka“ (J. Powortzniak), „Old McDonald“ i „Prvi valcer“ (J. Powortzniak), etide No XI-XII i XIII“ iz „Estudios Sencilos“ (Lea Brouwera), "Preludij br. 1" (H. Villa-Lobos) i "Capricho Arabe" (F. Tarrega).

Halloween (NOĆ VJEŠTICA) 2020

Zbog ograničenog broja učesnika i radi poštovanja svih epidemioloških mjera Halloween se ove godine odvijala tokom dana u nekoliko grupa. Učesnici su imali priliku doći u kostimima, učestvovati u raznim igrama, oslikavanju lica, zabavnim aktivnostima i uživati u grickalicama i osvježenju. Djeca koja nisu imala kostime imala su priliku zabaviti se slikanjem lica koje su radili međunarodni volonteri.



Međunarodni dan tolerancije

Omladinska organizacija Svitac je obilježila Međunarodni dan tolerancije online radionicom. Učesnici uzrasta 4-6 godina su pogledali animirani video "Moja prijateljica Isabel" na engleskom jeziku, koji je preveden na B/H/S jezike s temom tolerancije i koliko je važno poštovati različitost.

S grupom 13+ održali smo online diskusiju i razgovarali o riječi 'tolerancija' i šta im to lično znači. Naša poruka je zagovaranje važnosti mirnog suživota i prihvatanja i poštovanja drugih.



Međunarodni dan borbe protiv fašizma i antisemitizma

8. novembra se obilježava 82. godišnjica pogroma 'Kristallnacht' u Njemačkoj i Austriji. Ovo je bila "Noć razbijenog stakla – Kristalna noć" koja je 1938. godine ostavila više od 250 opustošenih sinagoga, preko 7000 uništenih firmi u vlasništvu Jevreja, preko 30 000 Jevreja zatvorenih u koncentracione logore. Mržnja se širila nekontrolisano, a tri godine kasnije svijet je vidio holokaust. Danas se prisjećamo tih strahota i kažemo #NeverAgain #NikadaViše.

Ovo vrijeme koristimo kao podsjetnik, da su fašizam i mržnja još uvijek među nama. Omladinska organizacija Svitac je obilježila ovaj dan sa grupom mladih ljudi iz Brčko distrikta, koji su govorili o snazi poezije. Ohrabрили smo ih da govore glasno i pošalju snažnu poruku protiv fašizma. Dijelovi teksta u videu su preuzeti sa web magazina "I am not a silent poet" od autora Dave Rendle-a. Njegova poema je posvećena Heather Heyer. Mlada žena je poginula 12. avgusta 2017. godine, kada se u skupinu prosvjednika automobilom zabio James Fields Jr. koji je bio fasciniran nacistima i Adolfom Hitlerom. <https://fb.watch/v/2RmWlxo50/>

Svjetski dan djeteta

Omladinska organizacija je 20.11., sa malim drugarima, uz pjesmu "Djeca su ukras svijeta" na online radionici obilježila Svjetski dan djeteta. Učesnici su ranije upoznati sa tekstom i melodijom ove pjesme, te su uz smijeh i druženje uživali za vrijeme radionice.

Na ovaj dan se u cijelom svijetu slavi godišnjica usvajanja Konvencije o pravima djeteta, pokreću akcije i posebno snažno zagovaraju najvažnija pitanja sa kojima se suočavaju djeca i mladi.

Poštujmo djecu, uvažavajmo njihova mišljenja i budimo im ne samo danas, nego uvijek dobar primjer !



Za decembar se planira nastavak svih aktivnosti Omladinske organizacije Svitac.



Institut za
razvoj mladih KULT

Ul. 4. Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org, web:www.mladi.org

Međunarodni dan protiv nasilja nad ženama #UzTebeSam

U BiH **svaka druga žena** doživjela je neki oblik **rodno zasnovanog nasilja**, a prema posljednjim statistikama, od početka pandemije virusa COVID-19 zabilježen je **porast od 50%** u slučajevima prijavljenog nasilja te procenti, nažalost, rastu iz dana u dan. Ovi poražavajući podaci nam govore da je nasilje nad ženama i djevojčicama **problem bh. društva** i smatramo da cijelo društvo mora reagirati. **Institut za razvoj mladih KULT** vodi se mišljenjem da prevencija nasilja nad ženama i djevojčicama leži u konstantnom slanju podrške žrtvama nasilja i njihovom ohrabrivanju te uključivanju društva u prevenciju ovog problema.



Već dugi niz godina, **svakog 25. u mjesecu** obilježavamo **Narandžasti dan – dan prevencije nasilja nad ženama i djevojčicama** kroz različite edukativne, kreativne i aktivističke inicijative. Pored Narandžastog dana, **Institut** aktivno učestvuje u obilježavanju **16 dana aktivizma** – kampanje čiji je cilj zaustavljanje nasilja nad ženama i djevojčicama i prevencija ovog problema.

Kampanja 16 dana aktivizma počinje 25. novembra, **Međunarodnim danom prevencije nasilja nad ženama** i traje do 10. decembra, **Međunarodnog dana ljudskih prava**.

Povodom obilježavanja Narandžastog dana i početka 16 dana aktivizma, **Institut za razvoj mladih KULT** i **NVO Obojena Klupa** su u saradnji sa **Međunarodnom srednjom školom Richmond Park** proveli aktivnost **Crtanje grafita STOP VIOLENCE**, tokom koje je **Benjamin Čengić** iz NVO Obojena Klupa uz pomoć učenika/ca ocrtao skicu čiji je autor **Faris Šehić**, pobjednik aktivnosti Sketch battle STOP VIOLENCE.

Kroz ove dvije aktivnosti nastojali smo na kreativan način uključiti što više ljudi u **prevenciju nasilja** te **skrenuti pažnju na važnost** djelovanja u polju prevencije nasilja.

Ovom prilikom najavljujemo i **početak kampanje Uz tebe sam!** čiji je cilj **slanje poruke podrške i ohrabrenja** ženama i djevojčicama žrtvama nasilja i **uključivanje šire zajednice** u prevenciju ovog problema. **Značajan broj** uspješnih ljudi iz BiH podržali su kampanju i **jasno poručili žrtvama – Uz tebe sam!**

Pozivamo sve zainteresirane da na svojim **Instagram i/ili Facebook** profilima postavite fotografiju na kojoj drže natpis **Uz tebe sam!** te na taj način se pridruže kampanji uz korištenje **heštega #UzTebeSam.**

Je li vrijeme za mlade u politici u Bosni i Hercegovini?

Vrlo često smo mogli čuti kako se u javnom prostoru govori da je potrebno pružiti šansu **mladima u politici** u Bosni i Hercegovini. Ta šansa je uglavnom bivala na nivou zadovoljenja forme ili je nije nikako ni bilo. Netom završeni lokalni izbori (ne računajući Mostar) donijeli su rezultate, što se dogodi kada **mladima** stvarno date **pravu šansu**: Kada su **nositelji listi ili kandidati za (grado)načelnika.**

Apsolutni rekorder po broju glasova na ovim izborima je mladi **Draško Stanivuković**, novi gradonačelnik Banje Luke, koji je, prema još uvijek neslužbenim podacima, osvojio 51.620 glasova. Ovo ga čini osobom koja je dobila najveći broj pojedinačnih glasova u BiH; istina, radi se o gradu sa najvećim brojem registrovanih birača u Bosni i Hercegovini, ali i dalje ne umanjuje uspjeh mlade osobe na ovim izborima.

S druge strane, mladi **Kenan Uzunović**, poprilično novo ime na političkoj sceni u Bosni i Hercegovini i Draškov vršnjak, osvojio je **6.867 glasova** za Gradsko vijeće Zenice. Obrađeno je 94,37% biračkih mjesta, a broj njegovih glasova mogao bi preći 7.000 nakon zvaničnih rezultata Lokalnih izbora.



Kenan je 27-godišnjak i trenutno rekorder po broju glasova za općinska/gradska vijeća u Federaciji BiH. Pored njih dvojice koji su po broju glasova nadmašili i svoje mnogo starije i iskusnije kolege, treba istaći i rezultate mladih iz Visokog **Belmina Zukana** i **Tarika Halilovića**, koji su, kao nositelji listi za Gradsko vijeće Visokog, osvojili mandate i u isto vrijeme osvojili najveći broj glasova unutar svojih listi. Njihov kolega, kandidat za Općinsko vijeće Viteza **Ekrem Sarajlić** također je bio nosilac liste i osvojio mandat kao kandidat sa ubjedljivo najvećim brojem glasova na svojoj listi. Zajedničko za ovu trojicu budućih vijećnika je da su pohađali **Obuku za omladinske političke lidere/ice UMiDp**, koju organizira **Institut za razvoj mladih KULT**. Program obuke namijenjen je mladim političarkama i političarima dobi od 18 do 30 godina, a koji dolaze iz različitih političkih stranaka i različitih lokalnih zajednica. Mladi političari kroz 15 dana obuke usvajaju znanja i vještine koje im pomažu da unaprijede svoje djelovanje u politici, a

posebno na polju prava za mlade. Tokom obuke imaju priliku teoretski i praktično učiti i graditi politički imidž koji je drugačiji, inovativniji i vršnjački prihvatljiviji.

Ovi rezultati dokazuju da su **mladi** spremni za **aktivno bavljenje politikom** i da mogu ostvariti značajne rezultate kada dobiju pravu priliku, ali i da je potrebno raditi na **educiranju mladih političarki i političara**. Ovi izbori dokazali su da **#mozeidrugacije** i da mladi mogu i hoće biti nositelji političkih i društvenih promjena u Bosni i Hercegovini. **Institut** će nastaviti analizirati izborne rezultate i provjeravati koliko mladih će se nalaziti u vijećničkim klupama, između ostalog i mladih koji su uspješno završili obuku **UMiDp**.

UMiD: Završen XI modul “Komunikacije i odnosi s javnostima”

Komunikacije i odnosi s javnostima tema je održanog modula obuke UMiD – Uči, misli, djeluj! za XVI generaciju.

UMiD obuka traje godinu dana, a učesnici obuke, omladinski lideri i liderice, tokom njenog trajanja aktivno učestvuju u realizaciji građanskih inicijativa u svojim lokalnim zajednicama.

UMiD se provodi već **15 godina**, a u toku je obuka za **16. generaciju**. Do sada je kroz ovu obuku prošlo **više od 300 mladih** iz svih dijelova Bosne i Hercegovine.

Modul je održan u **Obrazovno-raznodnom centru za mlade SPAJALICA** na Ilidži, od **12. do 14. novembra** 2020. godine.

Trener ovog modula bio je **Aldin Alić**, voditelj Odjela za odnose s javnostima u Institutu za razvoj mladih KULT.



Mladi su zajedno sa trenerom, razgovarali o **medijskoj pismenosti, poslovnim komunikacijama, javnom nastupu**, a imali su priliku i primijeniti naučeno.

Prvi dan obuke, u 18.00 sati organizovana je online debata mladih kandidata/kinja za Općinsko vijeće Ilidža.

U debati su učestvovali:

Dženeta Duraković (Platforma za progres)

Ammar Uzunović (SDP)

Edin Hadžihasanović (DF)

Haris Topalović (NiP) (bivši polaznik #UMiD i #UMiDp)

Adnan Avdić (Naša stranka) (polaznik #UMiDp)

Amel Pintol (SDA)

Ostale političke stranke su pozvane, ali nisu delegirale svoje predstavnike/ce.

Polaznici su imali priliku **postavljati pitanja** kandidatima i **analizirati njihove javne nastupe** te drugi dan obuke razgovarati sa trenerom o prednostima i manama tih nastupa.

Drugi dan obuke, polaznici su imali priliku davati izjave za **portal Fokus.ba**, što im je predstavljalo priliku da odmah primijene naučeno i **unaprijede svoj javni nastup**.

UMiD 16 provodi se u okviru inicijative "Dijalogom za zajedničku budućnost" uz podršku Ambasade Nizozemske u Bosni i Hercegovini.



Omladinski klub "DIJAMANT"

Ul. Bučići 42, 70101 Jajce
Tel./fax: +387 30 279 444, +387 61 179 209, +387 63 366 811
E-mail: m.sekib@bih.net.ba
WEB: www.ocd-dijamant.net, www.dijamantmoda.com

"AKTIVNI I MOBILNI"

Projekat „AKTIVNI i MOBILNI“ imao je za cilj podići nivo vještina o mobilnosti - učešće mladih u aktivnostima, te informiranosti mladih na području SBK/KSB Općine Jajce. Provedbom edukativno-praktičnih radionica, mladi su imali priliku da kroz pet područja interesa za mlade: zapošljavanje i poduzetništvo, aktivno sudjelovanje mladih u društvu, kultura mladih i slobodno vrijeme, mobilnost te informiranje, promoviranje politike mladih i savjetovanje. Tokom trajanja projekta mladi su informisani i savjetovani o programima i mjerama kroz koje su mogli sudjelovati u različitim oblicima mobilnosti, o mjerama i modelima samozapošljavanja, o radu udruženja mladih. Na ovaj način pomogli smo da se mlade osobe u potpunosti integriiraju u život lokalne zajednice.



Vrijedne Odbojkašice "Jajce-Nansen" na djelu

U okviru projekta "Eko aktivnosti protiv poroka", mlade i vrijedne odbojkašice, uprkos pogoršanoj zdravstvenoj situaciji, a u vezi COVID-19. nastavile su sa planiranim projektnim aktivnostima, a cilj je nastaviti kontinuitet aktivnosti edukativno - preventivnog rada i organizovanje sportskih događaja. Aktivnosti su dale priliku sudionicima za uključivanje, afirmaciju ženske i muške predškolske i osnovne školske populacije, razvoj međusobnog dijaloga, ljubav i sklonost prema sportu, kretanju i drugim fizičkim aktivnostima. Promotivno djelovanje kroz edukativno-praktične i sportske radionice, jačanje međusobnog dijaloga, upoznavanja, razmjene iskustava i prevazilaženje netrpeljivosti i razumjevanja drugog i drugačijeg. Također, projektne aktivnosti su doprinjele animiranju djece i mladih da se bave sportom i promocijom zdravih stilova života i pozitivan uticaj na njihov razvoj života. Aktivnosti je podržalo podržalo: Federalno ministarstvo obrazovanja i nauke. U klubu do sada nismo zabilježili slučaj oboljevanja od koronavirusa, tako da su sva djeca zdrava i spremna za predstojeću takmičarsku sezonu na Federeralnom nivou u organizaciji Odbojkaškog saveza FBiH.



INFORMACIJE / DONATORI / POZIVI

Ministarstvo za ljudska prava i izbjeglice BiH: Javni pozivi za dodjelu grant sredstava



Ministarstvo za ljudska prava i izbjeglice BiH objavilo je javne pozive za dodjelu grant sredstava za nevladine organizacije.

U budžetu Ministarstva za 2020. godinu grant sredstva osigurana u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2020. godinu u iznosu od 2.406.000,00 KM raspoređuju se na slijedeći način:

r/b	Tekući grantovi	Naziv granta	Iznos
1	Transferi drugim nivoima vlasti	Grant sredstva za stambeno zbrinjavanje Roma	1.000.000,00 KM
2	Transferi drugim nivoima vlasti	Grant sredstva za zapošljavanje Roma	600.000,00 KM
3	Transferi drugim nivoima vlasti	Grant sredstva za zdravstvenu zaštitu Roma	302.000,00 KM
4	Transferi drugim nivoima vlasti	Grant sredstva za obrazovanje Roma	48.000,00 KM
5	Transferi drugim nivoima vlasti	Grant podrške jedinicama lokalne samouprave za implementaciju Politike o saradnji sa iseljeništvom	100.000,00 KM
6	Grantovi neprofitnim organizacijama	Podrška organizacijama osoba sa invaliditetom	66.000,00 KM
7	Grantovi neprofitnim organizacijama	Grant podrške udruženjima nacionalnih manjina	130.000,00 KM
8	Grantovi neprofitnim organizacijama	Grant udruženjima porodica nestalih osoba u Bosni i Hercegovini	40.000,00 KM
9	Grantovi neprofitnim organizacijama	Grant organizacijama za ljudska prava u svrhu promocije ljudskih prava u Bosni i Hercegovini	50.000,00 KM
10	Grantovi neprofitnim organizacijama	Grantovi za aktivnosti prema iseljeništvu	10.000,00 KM
11	Grantovi neprofitnim organizacijama	Grantovi NVO uključenih u zaštitu trgovine ljudima	60.000,00 KM

Detaljnije o objavljenim javnim pozivima prema gore navedenoj tabeli pogledati [OVDJE](#).

Otvoren javni poziv projekta Evropske Unije EU4AGRI: 2,55 miliona KM za podršku investicijama u RURALNI TURIZAM U BiH

Projekat Evropske unije EU4AGRI objavio je danas javni poziv vrijedan 2,55 miliona KM za podršku investicijama u ruralni turizam u Bosni i Hercegovini s ciljem razvoja ekonomskih aktivnosti u ruralnim područjima, stvaranja novih i očuvanja postojećih radnih mjesta, te očuvanja prirodne i kulturne baštine, dogovarajući ujedno i na potrebe za oporavkom od krize prouzrokovane COVID-19 pandemijom.

Na javni poziv se mogu prijaviti isključivo partnerstva koja čine podnosilac prijave i minimalno tri partnera. Podnosilac prijave može biti jedinica lokalne samouprave, preduzeće ili obrt koji se bave pružanjem turističkih usluga i/ili proizvoda.

Svaki podnosilac prijave može aplicirati za bespovratna sredstva u iznosu **od 20.000 KM do 200.000 KM (bez PDV-a)** zavisno od broja članova u partnerstvu. Za svaku investiciju podnosilac prijave i partneri moraju osigurati vlastito sufinansiranje u iznosu od **minimalno 15%** od ukupnog iznosa investicije.

Svi zainteresirani mogu pristupiti javnom pozivu [ovdje](#).

Krajnji rok za podnošenje prijava je 21. decembar 2020. godine do 15.00 sati.

Okvirnu listu svih javnih poziva projekta EU4AGRI možete preuzeti [ovdje](#).

EU4AGRI je četverogodišnji (2020-2024) projekat Evropske unije vrijedan 20.25 miliona eura čiji je cilj modernizacija poljoprivredno-prehrambenog sektora u Bosni i Hercegovini. Projekat provode i sufinansiraju Razvojni program Ujedinjenih nacija (UNDP) u BiH i Češka razvojna agencija (CzDA).

Podsjećanje: USAID WHAM projekat – Novi javni poziv a dodjelu bespovratnih sredstava

USAID WHAM projekat poziva sve zainteresovane i kvalifikovane organizacije da dostave svoje projektne prijedloge za podršku trening centrima koji rade obuku malih i srednjih preduzeća iz sektora metala, drveta, tekstila/obuće ili IKT-a orijentisanih prema proširenju proizvodnih kapaciteta, dostizanju novih tržišta i otvaranja novih radnih mjesta.

Poziv je fokusiran na osposobljavanje radne snage.

Rok za dostavu aplikacija je 11.12.2020. do 18:00 časova po lokalnom vremenu.

Za više informacija i kompletnu dokumentaciju za prijavu posjetite web stranicu <https://www.whambih.org>.

Sva eventualna pitanja o procesu i proceduri prijave molimo da pošaljete putem e-maila na whamgrants@iesc.org.

Prijavite se na Collaboration izazov

Pulitzer center je raspisao konkurs za dodjelu grantova za sve zainteresovane novinare širom svijeta koji izvještavaju o situaciji izazvanoj korona virusom.



OBLAST:
Novinarstvo.

OPIS

Pulitzerov centar za izvještavanje o krizama je neprofitna organizacija koja podržava nezavisno svjetsko novinarstvo, traži prijedloge koji razvijaju inovativne pristupe izvještavanju o novoj korona krizi koristeći saradnju među novinarima i redakcijama preko državnih linija

ili državnih granica. Pulitzerov centar za izveštavanje o krizama podstiče prijedloge koji se usredsređuju na sistemska, nedovoljno prijavljena pitanja koja su bila osnova koronavirusne krize, koristite podatke i / ili interdisciplinarnu pristupe za izveštavanje o koronavirusu. Nagrada iznosi od 5.000 do 10.000 američkih dolara.

USLOVI

Novinari iz cijelog svijeta mogu se prijaviti. Pulitzerov centar otvoren je za prijedloge grupa slobodnih novinara koji rade zajedno i grupa redakcija koje sarađuju na projektu. Ljudi iz mnogih sredina i perspektiva osnaženi su da izveštavaju o virusnoj krizi. Posebno se ohrabruju novinari iz različitih društvenih, rasnih, etničkih, premalo zastupljenih grupa i ekonomskog porijekla. Novinari / članovi tima koji su zaposleni u redakcijama ili ih izdavač izdaje ne bi trebalo da budu uključeni u vaš prijedlog budžeta, ali troškovi izvođača radova (istraživači podataka ili vizualizacija podataka / dizajneri priča) mogu biti uključeni u prijedlog budžeta.

NAČIN PRIJAVE

Da biste se prijavili za grant morate popuniti aplikacionu formu na linku: <https://pulitzercenter.org/grant-application>

ROK ZA PRIJAVU:

31. decembar 2020. godine

Detaljnije: <https://pulitzercenter.org/>

German Marshall Fund: „Odgovor balkanskih organizacija civilnog društva na COVID - 19“!

G | M | F

The German Marshall Fund
of the United States

STRENGTHENING TRANSATLANTIC COOPERATION

German Marshall Fund @gmfus Novi poziv za dostavljanje prijedloga projekata u okviru projekta “Odgovor balkanskih organizacija civilnog društva na

COVID-19”!

Predloženi budžet ne treba da prelazi iznos od 25.000 \$.

Mogu se prijaviti organizacije civilnog društva iz Albanije, Bosne i Hercegovine, Hrvatske, sa Kosova, Crne Gore, Sjeverne Makedonije i Srbije.

Prijedloge projekata možete poslati do 31. januara, 2021.



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba

Mjesečni bilten uređuje
Omladinski resursni centar -
ORC Tuzla

Urednik Biltena:

Mirela Biković

Prevod Biltena na engleski: **Adnan Karamujić**

WEB stranica Mreže:
www.omladina-bih.net

Mejling lista Mreže:
posta@omladina-bih.net

Webmaster:
emir.delalic@gmail.com